

**Zeitschrift:** Le conteur vaudois : journal de la Suisse romande  
**Band:** 14 (1876)  
**Heft:** 34

**Artikel:** La guierra et la quiestion d'Orient  
**Autor:** C.-C.D.  
**DOI:** <https://doi.org/10.5169/seals-183861>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

**Download PDF:** 31.03.2025

**ETH-Bibliothek Zürich, E-Periodica, <https://www.e-periodica.ch>**

tony pourra être de la fête. Il m'a fait jurer sur le Coran de le tenir au courant de nos faits et gestes.

B. V.

#### La guerra et la quuestion d'Orient.

— Dis-vâi, Manuet, tè que te vas soveint pè Lozena, iò l'est qu'on sâ tot, qu'est-te cein què cliia guierra dè la Serbie, qu'on liait su lè papâi? Cein est-te on pâys coumeint la Suisse, que n'ein n'é jamé oiù dévesâ dévânt?

— Binsu que l'ein est ion; mâ cliiâo Serbiens sont soumet à la Turquie, que l'est tot coumeint no quand n'ira dézo lè Bernois, et sè vollion rebiffâ assebin, po cein que ne sont pas dè la méma religiion et que cliiâo Turcs sont dâi crouïo bougro avoué leu. L'ont bin demândâ dâo séco âi z'altro pâys dè la chrétientâ, mâ ne sè tsaillon pas dè lâi allâ, âo bin petout, lè z'ons voudront, mâ lè z'altro ne vollion pas que lâi aûlon.

— Et porquîè? ont-te pouâirè dè cliiâo Turcs?

— Oh na! Mâ l'est la quuestion d'Orient.

— Que dâo diablo est-te cein què cliia quuestion d'Orient, qu'on ein parlâvè dza à la guierra dé Crimée?

— Eh bin acuta, Janôt, tè vé cein esplikâ dâo mî que porri; mâ coumeint te n'as pas recordâ la Jographie et que te ne cognâi rein à la politiqua, tè vé cein derè de n'otra manière:

Emagina-tè 'na véva, qu'on lâi dit l'*Urope* et qu'a z'u 'na beinda d'einfants. On part sont moo, mâ ye restè chix valets et onna trouppâ dè felhiès que n'ousson rein derè quand lè gaillâ sè tsecagnon. Cliiâo valets s'appelon: *Cosaque, Hantz, Kâiserli, Picouline, Mobliot* et *Godem*. Et pi lâi a onco *Moustâfâ* qu'est on einfant dâo coté gautso, qu'est lo valet à la *Frique*.

Adon cliiâo valets sè sont partadzî lo domaino et sè sont separâ. Cosaque, Godem et Mobliot ont héretâ pè lâo fennès dâi bocons dè terra frou dâo territoire et Moustâfâ a z'u dâo coté dè sa mère on pecheint bin, mâ dâo crouïo terrain. Hantz et Picouline ont subastâ decé, delè, cauquîè partsets po s'arriondi et cein fâ qu'oreindrâi l'ont ti prâo terra. Kâiserli qu'avâi z'u 'na grossa porchon et que s'étâi âidî avoué Cosaque et Hantz à dépelhi son frârè Stanilâ quand l'a étâ assassinâ, a étâ puni pè Picouline que lâi a recoulâ dâi bouennès.

Moustâfâ, qu'avâi prâo bin pè sa mère a tot parâi z'u on bocon dâo bin dè cliia véva Urope, que Cosaque dit que cein n'est pas justo. Cé Moustâfâ est tuteu d'n'a petita gnice qu'on lâi dit *Serbie* qu'a assebin on grand courti. Adon cé tuteu a trait l'adze dâo courti et lo vâo pas rebaillî à cliia bouéba. Le l'a de à se z'altro z'onellio, mâ tandi que cliiâo lulus décion cein que vollion fèrè, Moustâfâ bregandè cliia petiota po la puni.

Ora, Janôt, se te m'as bin acutâ, tè pu derè cein que l'est què cliia quuestion d'Orient: Lo Godem, po allâ su lo bin dè sa fenna, dâi passâ su Moustâfâ, que ne lâi dâi pas lo tsemin; mâ l'ont fé on acto à bin plierè et cein est gaillâ coumoûdo po Godem que

n'a pas falta d'allâ verî âo diablo. Cosaque qu'a la radze d'atsetâ dâo terrain et que ne pâo pas souffri Moustâfâ, a bin einviâ dè fèrè 'na saisie perquie et coumeint l'a adé z'âo z'u idée dâo bin dè la fenna à Godem, lo Godem a 'na pouâire dè metsance que n'aussè lo domaino à Moustâfâ, po cein que lâi gravèrâi lo passadzo et que lo porrâi eimbétâ po dâi raméladzo pè la *fin* dâi *Zindè*.

Cosaque que sè vâi soveint avoué Hantz et Kâiserli, à la pinta d'amont, lâo z'a dza bin dâi iadzo de que l'avâi einviâ dâo bin à Moustâfâ; mâ lè z'altro sont pas tant conteints dè cein, surtot Hantz qu'a on maitrè-vôlet que tint à avâi on gros trouppé et que lâi dit: « Teni bon, et ditè à voutron frârè que vo ne lo laissî pas misâ solet se ne vo promet pas cein que vo z'appond dâo coté d'amont et se ne vo baillè pas on carro per d'avau. Et pi faut assebin que baillâi on bocon à Kâiserli; po lè trâi z'altro, on s'ein fo. »

Godem, Mobliot et Picouline que sè vâyon cauquîè iadzo âo cabaret d'avau sont prâo orgolliâo assebin et ne vollion pas que sâi de que lè z'altro ausson mé què leu. S'âmon pas tant avoué cliiâo d'amont. Hantz et Mobliot sè sont dza rudo tenu on part dè iadzo. Kâiserli et Picouline sè sont assebin vouistâ pè rappoo âi bouennès que Picouline a remouâ et ora Godem, fâ lo poeing à Cosaque po cein que Cosaque fâ état dè teni lo parti dè la Serbie, mâ n'est rein què po bailli 'na racliâie à Moustâfâ po que sâi d'obedzi dè lâi veindrè po rein cein que lâi restè, kâ cé Moustâfâ est on libertin qu'a quasu tot ricliâ avoué lè fennès et qu'est pliein dè dettès; mâ Godem ne vâo pas que Cosaque budzâi et lâi dit: « Se t'as lo malheu dè lo tsecagnî, m'ein mécllio! » Adon lè z'altro frarès sont quie que tâtson dè lâo gravâ de s'impougni et po cein ne vollion eimparâ ni l'on, ni l'altro. Godem, Mobliot et Picouline ne vollion pas po ti lè diablo que Cosaque robâi mé et Hantz et Kâiserli ne sont pas onco prâo assurâ dè cein que lâo vâo bailli.

Ora, c'est cé miquemaque que lâi diont la *quuestion d'Orient*; compreind-tou?

— On pou, mâ tot parâi pas tant; qu'est-te cein què cé Picouline, cé Moustâfâ et lè z'altro?

— Ah bin! t'és onco pe bête que ne crayé. Cliia véva, c'est don l'Urope...

— Eh bin! vâi, cein, lo sé.

— Ora, Cosaque, c'est la Russie; Hantz, lè z'Alle-magnès; Kâiserli, l'Autriche; Picouline, l'Etalie; Mobliot, la France; Godem, l'Angleterra et Moustâfâ, la Turquie.

— Vâi, vâi, vâi! ora lâi su... Oh! c'est cein... Compreingno, oreindrâi!... T'einlèvâi-te pas que cliia Jographie et cliia politiqua cein est coumoûdo. Avoué cein on dévenè tot. Cé guieux dè Cosaque!... Et cé certain Bismarque, lâi est-te pas assebin?

— L'est lo maitre-vôlet à Hantz.

— Bon! bon! bon!... L'est veré... Eh bin! ein tè remacheint Manuet. Pâyo quartetta à la premiere revoyance... Tot parâi cé Moustâfâ dâi pas étrè tant bin dein sa pé; faut que sè tigné bin. A revairè!

C.-C. D.